


TEZAU LITURGIC

25 Iunie

SLUJBA SF. CUVIOS- MĂRTURISITOR NICON BELIAEV DE LA OPTINA



MOSCOVA, 2000



Служба
преподобному Никону
Оптинскому, исповеднику
На вечерне

Стихиры на “Господи воззвах”, глас 4

Приидите возрадуемся Господеви / воскликнем
Богу Спасителю нашему: / яко удивил еси
Господи милость Твою на нас / и воздвигл еси в
дому отцев наших мужа богопросвещеннаго /
оптинскаго старчества благодатнаго
приемника / новомучеников Российских
восходящую звезду / иноков хваление и
исповедников красоту / Никона
преподобнейшего отца / Церкви Русской
незыблемое утверждение.

О, коль красны нози твои! / О, коль сладостны
уста твоя; / во изгнание текшия благовествующе
Спаса Христа / попирающе главу змиеву / и и
безбожнныя затыкающе уста / яко вторицею глас
Предтечев рек – / се Агнец Божий – / Иже спасет
Россию от години лютыя / Нань же надеющися
победим враги / Десницею Высокую.

Столп благочестия / монашествующих правило
известное / молитвы огненное светило сушим во
тьме / мужества твердое забрало / старца
Варсанофия избранное чадо / исповедников
Русских высокая похвала / Никоне отче
всечестне / твое стадо соблюди неврежденно от
сетей вражиих / и псы безбожныя прогони /
божественными предстательствы твоими.

Слава, глас 1

Монашествующих кроткое утешение / веры
непоколимое утверждение / неустрашимаго
борителя противу духов тьмы / страстей
искоренителя и безмезднаго врача / в
разсуждении искуснаго и блюстителя чистоты /
вернии вси стяжахом Никона приснопамятнаго /
оптинских преданий некрадомое сокровище /
лампаду неугасимую у Престола Божия /
благовонное кадило прилежнаго моления / иже
благоуветливым являет к нам Лице Праведнаго
Судии / и прошения восполняет / имже и
умиротворяются концы Русския земли / и
утешение сладостное приемлют сердца
сокрушенныя.

И ныне, глас 8

Виждь Елисавет, к Деве Марии глаголющу: / что
пришла еси ко мне Мати Господа моего? / Ты

Царя носиши, и аз воина, / Ты Законадавца, и
аз законоположителя, / Ты Слово, и аз глас, /
проповедающ Царство Небесное.

Стихиры на стиховне, глас 2

Светильник благочестия возсия днесь концем /
озаряя всю подсолнечную / землю Русскую
облистая исповеданием святым / светоносное
утро являя веры православныя / мрачную
разсеявающе безбожную ночь / и страстей вещи
попаляющий / Никон добропобедный
исповедник // Христа присно величающий.

Свет возия праведнику / и правым сердцем
веселие Щитом веры вооружся / богопротивных
множество враг победил еси / песнь во устех
нося богокраснаго исповедания / еюже
утверждаются монашествующих полки / и
злочестивыя посрамляются / и хвалится пустынь
Оптинская / и Церковь Русская красуется /
Никоне преподобне // Христа величающе.

Честна пред Господем / смерть преподобных Его

Ныне днесь светлаго торжества / Никон к Богу
преселяется / небеса радостию ширятся / душу
приемлюще всесвятую / старцы Оптинстии
соборно ликуют в Раю / на земли мощи своя во
обретение уготовляют / Тако бо изволися Духу

Святому/ еже первии последний будут/ и последний первии// Христа вкупе прославляюще.

Слава, глас 6

Вертоградарю старчества Оптинскаго/ и обители страже неусыпный/ садоделателю искусный явился еси отче Никоне/ егда прииде зной лютаго безбожия/ Словом животворным обильно еси я орошал/ тайнами божественными питая чад твоих/ но яростию гонений затворенни быша храмы оптинстии/ ты же бескровную жертву последнюю совершив/ во изгнание потекл еси яко на голгофу/ и ключем послушания дверь небесную отворив/ идеже во обители своя прияша ты старцы Оптинский/ с нимиже молися Христу/ и нам во обители райстей водворитися/ яко послушницы есьмы ваших велений.

И ныне, глас тойже

Елисавет зачат Предтечу благодати,/ Дева же Господа славы/ целовастеся обе матери/ и младенец възграся:/ внутрь бо раб хваляше Владыку./ Удивившись же, мати Предтечева начат вопити:/ откуда мне се/ да Мати Господа Моего прииде ко мне?/ Да спасет люди отчаянныя// Имеяй велию милость.

Тропари

Предтечи, глас 4

Пророче и Предтече пришествия Христова...

Слава, тропарь преподобному, глас тойже

Духовному твоему наставнику отче Никоне
всячески прилепился / и от него почерпал еси
мудрость старческую / во всем Христови
поработився / и иповедническим житием Того
прославив / монахом образ был еси / и старцев
Оптинских сожитель // с нимиже Христа Бога
моли непрестанно о всех нас.

И ныне, Богородичен, глас тойже

Еже от века утаенное...

На утрени

По 1-м стихословии седален, глас 8

Распяв постнически плоть всеславне, первее, и
еретическия потщался еси заградити безбожныя
уста, и молитвами победил еси демонския
полчища мужественне, темже венцем вышняго
звания венчался еси Никоне преподобне, моли
Христа Бога спастися душам нашим.

Слава, и ныне

Егоже сходи искони дней вечных, Сего
воплощаема во утробе Девической видела
еси,егда Матери Господа Своего нарекла еси
Деву, целовавшую тя, с Неюже молися
праведная Елисавето, да спасет души наша.

По 2-м стихословии седален, глас 8

Веры явился еси поборник победоносный, и
отеческих преданий блюститель быв,
непреклонен явился еси на ласкательства
мучителей богоборных, и исповеданием правым,
паству твою утвердив, сего ради яко камня тя
Церкви прославляем Никоне всечестне, моли
Каменя веры Христа Церковь Русскую в
православии утвердити и спасти души наша.

Слава, и ныне

Закона исполнение Тя, Отроковице, главизну
всего пророчества Захариезря, познавше
вопия: благословен, Пречистая, плод Твоего
чрева, яко посети и сотвори избавление людем
своим, и дарова нам велию милость.

По полиелее седален, глас 8

Воспитан был еси старцами Оптинскими, и
Божественным Духом просвещен, дерзновенный

проповедник явился еси православнаго предания, и монашествующих кроткий наставник и пастве твоей добрый пастырь быв, и мучителя посрамил еси беззаконнующа, темже на изгнание неправедное осужден был еси, Никоне преподобне, Христа Бога моли, грехов оставление подати, чтущим любовь святую память твою.

Слава, и ныне

Богородицу Тя исповедуем Владычице, Сыном Твоим рождшимся от Тебе, спасшиися грешнии раби, Бога бо непостижимо родила еси, Кровию Своею очищающаго нас от всякаго греха, и в райское веселие приводящаго, Егоже с Тобою восхваляем, веселящися.

Стихира по 50-м псалме, глас 6

Возсия днесь светоносная память твоя отче преподобне / озаряюща землю Русскую / тьму безбожия потребляюще / и утверждающе церковныя столпы / сердца верных просвещающа светлостию словес твоих / и еретичествующих лица помрачающа / яко сугубую благодать унаследовав старцев твоих / ихже и житию поревновав / доблемудрый исповедник Оптинский явися / Никоне богоблаженне / / моли о душах наших.

Канон преподобнаго глас 8, егоже краегранесие:

Яко благославную свирель ты, Никоне, воспою

Песнь 1

Ирмос: Поим Богу от горькия работы фараоновы
избавльшему Израиля и огненным столпом и
светлым облаком наставльшему яко прославися.

Явися красота церковная, память исповедника
оптинскаго облиста концем, Христова благодать
торжествует песненно, православным
украшаяся исповеданием того.

К поприщу приступив неослабным умом,
преподобне, неподдатлив явися на прилоги
демонския, на страсти добльствовав и
низложив, яко победы тезоименит, Никоне.

Оптинская слава, старчества печать, образ
монашествующим и постником правило, в
песнех да восхвалятся днесь, Никон
преподобный, о душах наших теплый
молитвенник.

Богородичен: Без семени зачала еси,
безболезненно роди, млекою воздоила еси Слово
воплощенное, Мариам Боголепная Девице; Твоя
певцы от бед спасай, присно.

Песнь 3

Иромос: Утвердися сердце мое во Господе, вознесся рог мой в Бозе моем, расширишася на враги моя уста моя, возвеселихся о спасении Твоем.

Лучезарная память Никона преподобнаго приспе, рождество препровождающе Предтечево, и светится обоюду и провозвещает концем, Христово домостроительство всеспасительное.

Ангел оптинский тя наречем, и труба исповедания благознаменитая, и монашествующих предводителю и низложитель бесов, богопроповедниче Никоне всечестне.

Горнее мудрование возлюбив, страстей и помыслов триволнения уклонился еси, в скиту Оптинском безмолвно возобитал еси, славне, отонудуже и почерпл еси, тайны неизреченныя веры.

Богородичен: Огнь Божественный во утробе прияла есть; и не опалися но паче украсися естество человеческое, темже Тя Богорадованная, яко одушевленный Божий престол поем; иже на Херувимех почивающего.

Седален, глас 8

Победив постническими борениями злокозненнаго, и безбожныя уста исповеданием правым заградив, старчества Оптинскаго был еси столп светозарнейший и новомучеников Российских благовонный цвет; с нимиже предстоя престолу Царя славы Христа, молися о чтущих тя, Никоне преподобне, и любовь зовущих: радуйся отче, яко победы тезоименит.

Слава Предтече, глас 8

Захариин плод, неплодныя цвет родися днесь...

И ныне, Богородичен

Обновила еси Чистая Божественным Рождеством Твоим, истлевшее во страстех земнородных мертвенное существо, и воздвигла еси вся от смерти к животу нетления. Темже Тя по долгу блажим вси Дево Пренепорочная, якоже прорекла еси.

Песнь 4

Ирмос: Твое вочеловечение, еже прежде век предопределил еси, в последняя благоволил еси совершити, Господи, услышах и страхом воспевах.

Светоч веры явился еси православныя, Никоне священне, в нощи безбожия присно светяй, зарю бо Духа всю в сердце приим, и возблистал еси светолучными проповеданьми.

Любви отеческой исполненный сый, павству твою грееши яко доилица, и посещаеши всегда, и храниши я от лютых враг.

Апостольски ревнуя преподобне, волки мысленныя гониши от стада твоего, и безбожныя уста заграждаеши, и хлебы боговедения питаеши присных чад.

Богородичен: Вседетельный Дух найде на Ея Всенепорочная, и Слово Божие в Тя вселися, и плоть бысть несказанно, пребыв неизменен.

Песнь 5

Ирмос: Вскую мя отринул еси, от лица Твоего, Свете Незаходимый и покрыла мя есть чуждая тьма, окаяннаго, но обрати мя к свету заповедей Твоих, пути моя направи, молюся.

Никона вси похвалим песненно, Оптинскаго старчества светлый венец; яко послушания рачителя, и яко постников похвалу, яко орган сладкогласный, сердца верных веселящий.

Учениче благопослушный явился еси Никоне, Варсанофия старца твоего всю мудрость сердцем приим, и яко финикс процвел еси преподобием и правдою, и плоды разсуждения собрал еси.

Юношеские стремления презрел еси преподобне, щитом веры оградився, и мечь молитвы взем, стрелы сокрушил еси стрельца лукаваго, и посекал еси терния страстей.

Богородичен: Солнце Славы с плотию носящи, мысленный явилася еси облак, Богородице, озаряющаго всю тварь светом Божественных благодати.

Песнь 6

Ирмос: Очисти мя спасе, многа бо беззакония моя, и из глубины зол возведи молюся, к Тебе бо возопих, и услыши мя, Боже спасения моего.

Веры православной утверждения и Церкви нерушимая стена, бысть исповедание твое Никоне всечестне, и монашествующим щит, и пастве твоей ограждение.

Искус послушания прошед, старчества благодать унаследовав, солнце рассуждения явился еси в безбожной нощи, вся наставил еси

на стези спасения, и заблудшия овцы во ограду Церкви воротил еси.

Рачением распалився преподобне, темничныя узы в биссер многоценный вменил еси, и бесчестия в похвалу, и злоключения в венец многоплетенный, имиже и почестей небесных достигл еси.

Еже страдати за Христа вожделевый, и душу за овцы положить хотяй, во изгнание, я ко на заклание веден был еси Никоне, идеже и воспел еси славу Христовых страстей.

Богородичен: Лествице Иаковля была еси Дево, Еюже сниде Христос, в плоть оболкийся от кровей твоих Чистая, и в горния възиде, идеже и спосади нас на Всевышний Престол.

Кондак, глас 1

Сердце яко скрижаль богописанну стяжал еси /
ум якоже небо ясное / резцом послушания
красоту монашества изобразив / и Славу Божию
твоим исповеданием возвестив / Никоне отче
преподобне / Оптиной Пустыни хвала и
утверждение / молися богогласе спастися всем /
благочестно тя почитающим.

Икос

Твоих глаголов вкусивше отче, яко сладкий ты плод послушания дерзаю воспети, но яко дел отнюдь не имея, медью звенящей являюсь, и яко воздух биях обретаюсь, но обаче на твою помощь надеясь любовью тебе зову: радуйся, исповедников столп крепкий; радуйся, Церкви немолчная уста; радуйся, поток мутнаго безбожия изсушивый; радуйся, яко монашествующих утвердивый; радуйся, послушания светлая стезя; радуйся, добропобедная Оптинская труба; радуйся, молитвы негасимый светильник; радуйся, кадила благовонный фемиям; радуйся, Никоне богогласе, молитвениче о всех благочестно ты почитающих!

Песнь 7

Ирмос: Божия снисхождения огонь устыдился в Вавилоне иногда. Сего ради отроцы в печи радованною ногою, яко во цветнице ликующе пояху: благословен еси, Боже отец наших.

Течение совершив неукоризненно, и веру соблюл еси непреложну, нечестивыя обличил еси соборища, Никоне богомудре, и предание отеческое утвердил еси, Бога отцев наших.

Яко благочестия проповедник, гоним Иисуса ради бываеши, и яко благовестник сый, Слово Божие во устех твоих не вяжется, но достигаеши Архангельска и утверждаеши малодушныя, и концы земли Русския просвещаеши.

Новомучеников ты Российских цвете, и старчества Оптинскаго венечник пресветлый, в твоей памяти светло ликующих посети, и от бед избави Никоне преподобне, и страстей треволнения свободы, вопиющих: Боже благословен еси.

Богородичен: Изцели язвы души моея Владычице, и ума исправи движения, к воплем из Тебе воплощегося Слова Бога отцев наших.

Песнь 8

Ирмос: Муסיкийским органом согласующим, и людем безчисленным, покланяющимся образу в Деире, три отроцы не повинувшеса, Господа воспеваху, и славословяху во вся веки.

Каплями твоих слез угасил еси угли греховныя, и страданьми твоими утвердил еси люди в вере колеблемыя, и во изгнании доблествовав мудре, проповеданием, и по конце точиши исцелений пучину, притекающим к тебе.

Оптинская созвучная свирель был еси,
сострадальцам твоим, Никоне, и пастырям,
Исаакию мученику славному и старцу
Нектарию, и яко единомудренно подвизастеся, в
горнем согласно поете Христа во вся веки.

Непоколебимая вера твоя, славы яви тя
нестерпимой причастника, темже и враги
безплотныя низложил еси, и еретичествующих
уста словом истины заградил еси, православя
Христа во вся веки.

Елеем Духа помазан быв, сердца умягчил еси
безблагодатныя, и веру всеяв и исповеданием
возрастив, и умножил еси чада церковныя,
Никоне старче богоблагодатный.

Богородичен: Всенепорочная Мати Дево, Света
жилище явилася еси нас ради из Тебе
явившагося, Егоже моли непрестанно,
просветити мысли наша, благочестно Тя поющих
во вся веки.

Песнь 9

Ирмос: Да умолчит еретиков собрание, не
истинно Богородицу исповедающих Тя, ибо
свыше Тя пророцы проповедаша, Мать быти
Божию, и Ходатаицу рода нашего. Тем Тя, Дево,
величаем.

Отцев Оптинских славу тя зрим, и новомучеников Роскийских украшение, подвиги постническими цветуща, и венцем увенчанна исповедническим, Никоне всечестне, в горнем ныне живуще не забуди тя величающим.

Светиши на церковней высоте, страстотерпческими сияя добротами, и Божественными лучами молитв твоих, озаряеши всех притекающих к тебе верою и любовью тя величающа.

Предстояще Престолу Судии всех Царя, мольбу принеси о земном твоём отечестве, и демонския разори полчища, и безбожную тьму потреби, силою тебе содействующа Всесвятаго Духа.

Обитель твою покрывай и тя славящия в ней спасай от бед и искушений демонских, и в век века Православие утверди, Христа величати тебе прославльшаго.

Богородичен: Южика Твоего Дево рождество чтим и Никона исповедника божественнаго преставление прославляем темже с ними молися скит Предтечев и обитель Оптинскую избавити от нахождений вражиих, и еретичествующих возстание в конец низложи, не почитающих Твоего святолепнаго образа.

Светилен

Течение красных твоих ног Никоне преподобне,
возвратив к шествию небесному, возшел еси
радуясь, и Троице представ, гласы трисвятыми
пою Ю со отцы Оптинскими; сего ради
пресвященную твою память верою празднуем и
молим, страстей ны избави, твоими
предстательствы.

Слава Предтече

Предтечево днесь радостотворное рождение
сетование решит отча безгласия и рождшия
неплодство, возвещает же настоящую радость и
веселие, темже и вся тварь светло тя празднует.

И ныне, Богородичен

Премудрость ипостасную, и Слово присущное, и
Врача душ и телес рождшая, гноения и рану
души моя изцели лютыя и временныя, и сердца
моего устави болезни, Дево.

**Стихиры на хвалитех, глас 8, подобен: О,
Преславнаго чудесе!**

О, Преславнаго чудесе / явися красота
монашества / Церкви незыблемое утверждение /
послушания стезя предельная / старцев
оптинских богодухновенная песнь: / приемник

даров сыноположения / Никон благопослушный
ученик / иже точит цельбы обильныя / любовьию
празднующим память его.

О, Преславнаго чудесе / любви ради Христовы /
вся яже на земли презрел еси / Никоне
преподобне / в скиту Оптинстем вселился еси / и
старцами богомудрыми воспитався / столп
православия явился еси / и монашествующих
утверждение. / Темже молися Христу даровати
душам нашим велию милость.

О, Преславнаго чудесе / цвете монашескаго
веселия / новомучеников Русских благовоный
фимиам / инокующим кроткий наставник /
исповедников ритор божественный / трубо
оптинская / Никоне всеблаженне / твою память
благочестно почитающих / моли избавити от бед
и скорбей грядущих на вселенную.

Сия стихира в Пинеге, идеже покоятся мощи
преподобнаго, поется на Славе

Возрадуйся граде Пинего / восплеши рекою
вкупе / подвигнися богоспасаемая паства
торжествующе / глас хваления возвыси Богу /
прославляя светлаго подижника благочестия /
Никона старца Оптинскаго / иже края твоего
достиже / и огласи божественным
проповеданием воздух твой / подвиги

благочестия бесовскую прелесть потребив / и
удоблив землю мощми благодатными / в
Небесный град преселился есть / и
градодержцем незримым твоим явився / темже
в недрах своих имуще таковое многоценное
сокровище / яко основание непоколебимо / реки
исцелений точаще обильно / воспой ликующе: /
слава Тебе Боже Всещедрый / во святых Твоих
почивающий.

Слава глас тойже

Приидите празднлюбивых собори / песньми яко
трубы воспоем Никона божественнаго / Церкви
Русской украшение / старцев зеркало
святолепное / иноков степень высокая /
исповедников Оптинских светозарную звезду /
иже облистает лучами истины вся верныя / и
благодатию утешает сердца. / Темже к нему сице
возопиим: / приближися к нам сущим во тьме
смертней / и просвети чада твоя / любовью
поющих рождество Предтечево / и верою
празднующих святое твое преставление.

И ныне глас тойже

Спаса, Богомати во утробе, Дево, носящи Слова
Безначальнаго Елисавети позналася еси Пророчице и
дом уяснившая Захариин иже Иоанна родил есть. С
нимиже молися спастися душам нашим.